

# Budget 2015 dat da discurrer

■(anr/fa) Durant la sessiun da december prenda il cussegl grond adina enconuschientscha tant dal program annual 2015 sco era dal budget per quel onn. Il parlament era da l'avis ch'i saja da spargnar ils proxims onns. Per proxim onn ha budgetà il chantun Grischun in deficit da 55 milliuns francs. Quai è praticamain medem blier sco l'onn avant. Quest deficit resulta da sortidas per l'import da totalmain 2,5 milliardas francs. Tenor las infurmaziuns da la directura da finanzas *Barbara Janom Steiner* sa chatta il chantun Grischun anc en ina buna situaziun. Il chantun nun haja praticamain nagins daivets e possa perquai sa prestar anc quest deficit da 55 milliuns francs, ha ella ditg ier ed avertì ch'ins stoppia però far quint ils proxims onns cun pli gronds surplis da sortidas. Ella ha menziunà la cifra da fin 100 milliuns francs e ditg ch'i saja perquai da guardar da mantegnair la disciplina en connex cun las expensas. «Ma augments da la taglia na prevesain nus betg.»

## Evitar da daventar pli dependents da la Bassa

Il president da la cumissiun da gestiun, *Leonhard Kunz* (pld, Maiavilla) ha declerà la metoda co che la cumissiun ha controllà il budget. Er el ha menziunà ils signals pauc buns en quai che regardia il svilup da l'economia. Tenor Kunz vegnan las consequenzas da l'iniziativa da segundas abitaziuns ad influenzer vivanant da maniera negativa l'economia chantunala. *Conradin Caviezel* (ps, Cuira) ha era manegià ch'il deficit da 55 milliuns francs na saja betg allegrivel, «ma causa las bieras entradas dals ultims onns supportabel».



Co enavant cun las finanzas dal chantun? Spargnar u investir? Quella dumonda fatschenta il cussegl grond dapi decennis.

FOTO P. DE JONG

El ha ditg ch'il chantun stoppia ils proxims onns spargnar «ed evitar uschia da daventar pli dependent da la Bassa». Era *Hans Geisseler* (pcd, Vaz Sut) ha ditg ch'il chantun stoppia guardar da spargnar nua pussaivel. *Andrea Steiger* (Flem, indep.) ha avertì ch'era las vischnancas vegnian a badair las consequenzas dal svilup regressiv da las entradas chantunalas. *Barbara Janom Steiner* ha tratg endament ch'il parlament haja dapi l'onn 2010 adina tscherni la varianta la pli chara tar differents affars poli-

tics, «da moda ch'il chantun ha uss da sorprender custs supplementars per l'import dad 83,4 milliuns francs.» I saja perquai da spargnar en ils proxims onns, ha ella ditg, «ma betg anc cun in pachet da spargn sco l'onn 2003, quella giada era il basegn blier pli grond. Dal 2003 aveva il chantun 14 milliuns francs agen chapital ed uss 2,7 milliardas francs e da quels var 500 milliuns francs meds liquids.» Tar la fin da redacziun ha decis il parlament da tractar il budget 2015 da maniera detagliada.